

編號 1 號 【幸福个味緒】 李淑娟原作

幸福係麼个味緒？有人會講，係放學時節轉到屋下，對灶下飄散出來个爛豬腳香味；有人會講，係阿爸下班過後圓身項臭汗臊个味緒；乜有人講，係暗晡頭屋背該頭桂花樹淡淡个花香。味緒，看毋著、聽毋著乜摸毋著，盡趣妙个係，佢總係做得同兜兜个回憶同共下，食著、鼻著共樣味緒个時節，回憶乜會跔等像戲齣樣仔又再放送出來。

吾爸在佢讀國中三年生个時節過身咧，因為發現肝癌个時節忒慢，既經第三期。佢辭忒頭路拖等著病个身體做咧年過个治療，攞吾姆同佢兩兄弟就轉長山賣鴨卵地。阿爸分佢印象最深个毋係長壽菸个味緒，毋係醫院吊大甕射个藥味，顛倒係厥手路菜「番茄¹炒卵」个好味緒。

阿爸个「番茄炒卵」定著愛特別用臨暗頭市場項伸个、有靠傷个、爌爌个番茄，因為該下仔頭家愛收攤地，會半買半相送。佢當沙鼻講：「雖然這毋係星級个材料，毋過有阿爸五星級个好手藝啊！」斷真哦！這項菜上桌个時節，紅啾油光油光个番茄，

合等該綿綿嫩嫩又黃蠟个雞卵，還官入嘴就先吞口涎水哩。該香香又酸酸甜甜个味緒，單淨攪味就做得划忒兩碗白飯，這幸福个味緒一直同在佢个記憶裡背毋會散忒。

阿爸做化療該段時間，阿姆天官光愛先去送牛乳，再趕去工地做小工，無時間煮飯。佢同老弟輒常食白飯傍醬菜、豆腐乳、魚仔罐頭，係無就泡麵加一粒雞卵。阿爸愁慮佢兜營養毋罅，刻耐仔忍等身體个毋鬆爽煮菜分佢兜食。每擺酸酸甜甜个味緒食落肚，佢个心乜跔等酸酸甜甜，甜个係阿爸惜子个心意，酸个係，毋知還做得再食著幾多擺這幸福个味緒？

對佢來講，幸福就係「番茄炒卵」該酸酸甜甜个味緒，佢總會帶出佢最深、最甜个回憶，分佢看著阿爸黃蠟个面容項掛等滿足个笑容。這下佢又乜最驚食著這項菜，因為佢驚食忒多別家个「番茄炒卵」，會害佢添放忒記憶當中阿爸留分佢个味緒，該阿爸惜子个味緒，佢同阿爸共下个幸福味緒。

¹番茄：音 toˋma doˋ（英文 tomato），屬茄科，又名柑仔蜜、西紅柿等。

編號 2 號 【講分人增志个話】 彭瑞珠原作

細細仔个時節，係講俚毋堵好在禾埕跌倒，黏時就會聽著吾婆盡毋盼得个聲：「啊哦，吾心肝仔！毋怕、毋怕，會較高咧！」雖然，佢毋會來牽佢，愛等佢跣起來，正會跔下來看佢有哪位受傷無？毋過，這句有惜又有鼓勵个話，有安慰著佢。就算痛到目汁跔等就哼出來吔，佢乜罕得噉，因為，佢想等：「佢會較高……。」就毋記得痛吔！

雖然佢講：「自家跌倒，愛自家蹶跣起來；該痛，乜無人好代你痛啊！」毋過，見擺係有人嫌佢：「這……，大頭确！細妹人个額頭恁闊，合……有生角哦！」吾婆就會代佢應講：「吾孫女仔，天庭飽足、日月有照，係聰明又有福氣个人，你知人麼个！」該係吾婆罕得同人訕嘴个時節。

麼个係「天庭飽足、日月有照」，佢毋知；該句「聰明又有福氣个人」，佢聽有。加添，學校个智力測驗乜講佢比一般个人「聰慧」，故所，佢相信吾婆講个：佢係一個有福氣个人。因為聰明，學校先生、屋下阿姆都會𠵿¹已多事頭分佢拵做

，佢自家又有當多想看个書、想學个才藝，「時間管理」就變到當重要。因爭係「有福氣个人」，故所，項項事頭佢都準係學才藝恁樣，做到當歡喜，其實乜比讀書好搞多吔。

記得有一擺，佢投吾婆講：「某某伯姆，講若壞話！」吾婆先看向該伯姆屋下，又看等佢逐日會經過个屋前路面，再看向崁下个河壩，正應佢講：「佢，盡煞猛哦！」意思係講：有影、無影由在人，佢淨看著佢个認分摻煞猛。吾婆無讀過書，哪知「三人行，必有我師」這句話，毋過，「擇人个優點，來學習；反省自家，有共樣个缺點無？」這，確實係吾婆教佢个。

惜你个人，望你幸福、望你增志，總係會鼓勵你；希望，恁兜講出去个話，乜做得鼓勵著別人，分人一時受用或者係一生人受用，都好！

¹ 𠵿：音 pang¹；分配、分散。

編號 3 號 【客家烏鶯阿醺】 巫沂庭原作

佢做細人个時節，畜一隻得人惜到耐毋得个烏鶯。雖然佢離開吾身邊去做仙拗蠻久咧，但係吾心肝肚永久會留一個思念个所在分佢。見擺在腦膈肚無意中瞞過頭擺同佢相處个種種，艱苦个心情就陣陣緊湧起來，淦淦脹脹，像硬硬會哼出來樣仔。

小學三年該時有一日，戴在共莊頭个姨丈對佢做事个所在——金山帶轉三隻盲生幼毛个細烏鶯。「啊哦！仰有恁得人惜个鳥仔？」阿爸忍毋核阿腦講。「分佢兜一隻來畜好無？」阿爸同姨丈要求。

「好啦，自家擇一隻轉去畜……。」姨丈有一息仔毋盼得。

就恁仔，這隻鳥仔開始同佢兜共下做伴，有佢兜个所在總係有佢細細个身影。在佢兜細心細意个照顧下，阿醺身胚仔生來結實又硬程。阿姆成時會切兜仔幼豬肉絲畀食，故所厥毛看起來越勢¹烏金好看。因為厥圓身圓滾滾，故所佢同佢安一個得人惜个名仔——「阿醺」。

聽人講烏鶯曉得學人講話，阿爸毋知哪時就走去市場買一個掇舌枋²偷凶轉屋分阿醺齧，有影樣仔，阿醺親像緊來緊會學人講話咁呢，還生趣哦！

阿爸、阿姆原旦戴在東勢該片，因為阿爸想愛開店做生理，佢心肝恁想毋好擢忒屋下一儕人創業，將就渡歸屋下人上臺北定貼下來。雖然離開東勢恁遠，毋過佢兜從來毋識毋記得祖宗言。打幫爺哀个堅心，佢兜用大埔腔同佢兩個細人仔教會講客，今晡日佢有機會將客話傳承分後輩，這總下愛感謝吾个爺哀。還使講，家庭係傳承母語盡好个所在，較仰仔都毋好擢忒正好。

佢兜乜教阿醺講客，佢講來已正，唉哉³，根本佢就係一隻客家烏鶯啊！有成時阿爸睡當晝有人客光臨个時節，阿醺看阿爸還睡等無停動，就玄玄風抽骸另命，一到又一到喊阿爸个名仔，直直喊到阿爸精神咧，佢正恬恬無過出聲。這下佢兜正發現阿醺還會掅做生理呢，毋成猴，仰會恁慶啊！

當希望時間頓恬在阿醺還在該時節，有佢做伴个時節，佢兜逐日過到歡喜合樂暢。前前後後佢陪佢兜總共有十五年，實在盡貼心！見擺想著佢得人惜个樣仔，都會害佢歸粒心肝地等纏纏，毋得伸揸⁴……。想愛在心肝恬聲同阿醺講一句：「承蒙吾个青春有你共下，正來寮。」

¹ 越勢：音 ied sii；更加。

² 掇舌枋：音 no[˘] sad biong^ˊ；磨舌板。

³ 唉哉：音 ai^ˊ zai[˘]；讚嘆之口語。

⁴ 伸揸：音 cun^ˊ ca^ˊ；平順。